

ያይቆቢ ፃፊዳ ኪታ ጋላ ቆፋ

ያይቆባ ኪታይ፡ አማኒያ እሲ ጋላስ ጋላስ ባ ዴዑዋ ካሌሌያ ቆፋታ ኦይኪስ። ሃ ኪታይ ፃፊቲዳይ፡ ቢታ ኡባን ላሌቲዳ ታማኔ ናምዑ አይሁዳ ዜሬላሳ። ሃ ማፃፋ ፃፊይ፡ ጨንጫቴሉ ኑኒ ኦሶን ፔሺያ ሂላ፡ አማኒያ እሳ ሞኮባኔ ሎዖ ካንዶስ ኦኔ ቤሲያ ኦዳታ ሚሲሌዳ ቆንጨሲስ።

ያይቆባ ኪታይ፡ ማንቆቴላባ፡ ዲሬቴላባ፡ ፓጩባ፡ ሎዖ ካንዶባ፡ ቃናቴባ፡ አማኖባ፡ ሎዖ ኦሶባ፡ ኢንፃርሳ ሃርባ፡ ጨንጫቴላባ፡ ኢሶይ ኢሱዋራ ኦሻባ፡ ኦቶርባ፡ አሽኬቴላባ፡ ሃራ እሳ ቦላ ፒርዳባ፡ ጨቁቴላባ፡ ጌንጫባ፡ ዎሳባኔ አማኒያ እሲ ኦላናው ቤሲያባ ኡባ ቆሪዲ ፃፊስ።

ያይቆባ ኪታይ፡ አማኖ ዴዖን አማኖይ ኦሶን ፔጊያ ሃናታታ ቆንጨሲዲ ቤሲስ።

ያይቆባ ኪታ ኦይፊ ቆፋታ

- ሳርሶ 1:1
- አማኖኔ ጨንጫቴሉ 1:2-8
- ማንቆቴሉኔ ዲሬቴሉ 1:9-11
- ፓጩ 1:12-18
- ዖሳ ቃላ ሲሲኔ ኦሶን ፔሾ 1:19-27
- እሴ አሳፔ ዲማኖ ኮሾናይሳ 2:1-13
- አማኖኔ ኦሶ 2:14-26
- ኢንፃርሲ ሃርባ 3:1-18
- አማኒያ እሲኔ ሃ ኦላሚያ 4:1-5:6
- ዲማ ዲማ ዞሬታ 5:7-20

1 ዖሳኔ ጎዳ ዬሱስ ኪሪስቶሳ ኦይሌይ፡ ያይቆቢ፡ ቢታ ኡባን ላሌቲዳ ታማኔ ናምዑ ሹሻታስ ኪቲዳ ኪታ።

ሳር፡ ኦይ ሜላ ዴዔቲ?

አማኖኔ ጨንጫቴሉ

2 ታ ኦሻቶ፡ ሂንቴና ዲማ ዲማ ፓጩይ ጋኪያ ዎዴ ሂንቴ ሎዖባ ዴሚዳዳ ኩሜላ ኡፋይሳን ኤኪቴ።

3 ሂንቴ አማኑዋ ፓጩቴላይ ዳንዳዓ ሂንቴው ኢሜይሳ ኤሬታ።

1:1 ማቶ 13:55፤ ማር 6:3፤ ሃ.ኦ 15:13፤ ጋላ 1:19

4 ሂንቲ ወርሴላ ጋካናው ዳንዳዲኮ አይቢ ፓጩይ ባይና ፖሎኔ ኩሜላ ጊዳታ።

5 ሂንቲፌ ኦዴሰካ ጨንጨቱላ ጳዩኮ ያሳ ዋሶ። ኢያው ኢሚታና። ያሳይ ኦናካ ቦሮና ኡባሰ ኬሃቴላን ኢሚያ ያሴ።

6 ሺን ኢ ዋሶያ ዋዴ ሲዶና አማኖን ያሳ ዋሶ። ሲዲያ ኦኒካ ጨርኮይ ሱጊን ቃዲያ አባ ዙሌ ሜላ።

7-8 ናሞቡ ቆፊ ዴዴይኔ ባ ኦጊያን ኤቆና ኦኒካ ጎዳፔ አይኮካ ዴማና ጊዲ ቆፖሮ።

ማንቆ አሳኔ ዱሬ አሳ

9 አማኒያ ማንቆ አሳቲ፣ ያሳይ ኤንታና ዶቁ ኦሊያ ዋዴ ኡፋይቶ።

10 ቃሲ አማኒያ ዱሬ አሳቲ ያሳይ ኤንታና ዚቁ ኦሊያ ዋዴ ኡፋይቶ። ዱሬ አሳቲ ጨሻዳ ጳያና።

11 አዋይ ባ ሚሻራ ኬዩዲ ማታ ሜሊሲን፣ ጨሻይ ቆሌቴሰ፤ ኢያ ሎዎቴላይካ ጳዩሰ። ሄሳዳካ፣ ዱሬ አሳቲ ባንታ ኦሱዋን ዳቡሪሼ ጳያና።

አሴ ጋኪያ ፓጩያ

12 ሜቱዋ ያኒዲ አዲዳፔ ጉዬ፣ ያሳይ ባና ሲቁይሳታሰ አማና ጊዲ ቃላ ጌሊዳ ዴዎ ካላቻ ኤካና ጊሾ ሜቶን ጌንጨያ አሲ አንጃቲዳይሳ።

13 ኦኒካ ፓጩቲያ ዋዴ «ታና ያሳይ ፓጩሰ» ጎፖ። ያሳይ ኢታን ፓጩቴና፤ ቃሲ ኢ ኦናካ ፓጩ።

14 ሺን ኢሲ ኢሲ አሲ ባ ኢታ አሙዋን ጎሽቲያ ዋዴኔ ጨሚቲያ ዋዴ ፓጩቴሰ።

15 ሄሳፌ ጉዬ፣ አሞቴላ ቃንላቲዲ ናጋራ ዩሌሰ፤ ቃሲ ናጋሪ ዲጨዲ ሃይቆ ዩሌሰ።

16 ታ ሲቆ አሻቶ፣ ጨሚቶፊቲ።

17 ሎዎ አሞይኔ ኩሜላ አንጅ ኡባይ ሳሎፔኔ ሳሎዋ ፖቡዋ ሜዲዳ ያሳ አዋፔ ዩሰ። ያሳይ ኩያዳ ኡባ ዋዴ ላሜቴና።

18 ኦኒ፣ ኢያ ሜዴቴላሰ ኮይሮ ጊዳና ሜላ ኦና ቱማ ቃላን ባ ሼኔን ዩሊሰ።

ሲሲኔ ኦሶ

19 ታ ሲቆ አሻቶ፣ ሃይሳ አኬኪቲ። አሲ ኡባይ ሲዳናው ኤሌሶ፣ ሺን ኦዴታናዉኔ ሃንቁታናው ኤሌሶፖ።

20 አሳ ሃንቆይ ያሳይ ኮያ ዲሎቴላ ኤሄና።

21 ሄሳ ገሸ፣ ቱና ሃኖታኔ ኢታቴላ ኡባ ዲጊዲ፣ ያሳይ ሂንቴ ዎዛናን ቶኪዲ ሂንቴ ሼምፑዎ አሻናው ዳንዳዲያ ቃላ ኣዳቴላን ኤኪቴ።

22 ሺን ያሳ ቃላ ኦሶን ፔሺቴፔ ኣቲን ሲሳ ዓላላን ሂንቴና ጨሞፊቴ።

23 ቃላ ሲዲዲ ኦሶና ኣሲ፣ ኢ ባ ሶምዑዎ ማሰቶቴን በዓዲያ ኣሳ ሜላ።

24 ኢ ባ ሶምዑዎ በዓዲዲ በስ፣ ሺን ኢ ኣይ ዳኒያኮ ኤሌሲ ደጌሰ።

25 ሺን ኦኒካ ኣይሌቴላፊ ኬሲያ ፖሎ ሂጊያ ኣከካን በዓዲዲ፣ ካሊዲ ናጌይ፣ ሲዲዲይሳ ደጎና ኦሶን ፔሺያ ኡራይ፣ ባ ኦሶ ኡባን ኣንጄታና።

26 ባ ኢንፃርሳ ናጎና ኣማናይሰ ጊያ ኡራይ ባና ጨሜሰ፤ ኢያ ኣማናይ ሃዳ።

27 ያሳ ኣዎ ሲንላን ቦሬይ ባይና ጌሻ ኣማናይ ሃይሳ፣ ኣያ ኣዉ ባይና ናይታኔ ኣምዔታ ማዶኔ ኣላሚያ ቱናፔ ባና ናጎ።

2

ኣሴ ሻኮፋ

1 ታ ኢሻቶ፣ ሂንቴ ኑ ቦንቾ ጎዳ ዬሱሰ ኪሪሰቶሳ ኣማኒያባ ጊዲኮ፣ ኣሳ ሶምዎ ዪሊዲ ኣሴ ቦንቾፊቴ።

2 ለሚሶስ፣ ዎርቃ ሚጊደ ኣሊዲ፣ ሎዎ ማዎ ማዒዳ ዲሬ ኣሲ ሂንቴ ሺቁዎ ዩሰ። ቃሲ ጨርቃ ማዎ ማዒዳ ማንቆ ኣሲካ ዩሰ።

3 ሎዎ ማዎ ማዒዳ ኣዲያ ሂንቴ ኣሊ ቦንቹዲ፣ «ኔ ሃይሳን ሎዲያ ኦይዲያን ኡታ» ጊዲ፣ ቃሲ ማንቆ ኣዲያ፣ «ኔ ያን ኤቃ ዎይኮ ሃይሳን ታ ቶሁዎ ማታን ሳዓን ኡታ» ጌታ።

4 ያቲን፣ ሂንቴ፣ ሂንቴ ጊደን ሻኬቴሊ ሜዴይሳታኔ ኢታ ቆፋራ ዳዲያ ዳይናታ ሜላ ጊዳኬቴዬ?

5 ታ ሲቆ ኢሻቶ፣ ሰዒቴ። ኣማናን ዲሬ ጊደና ሜላኔ ባና ሰቆይሳታሰ ኢማና ጊዳ ሳሎ ካዎቴላ ላታና ሜላ ሃ ሳዓን ዳዲያ ማንቆታ ያሳይ ደሪበኔዬ?

6 ሺን ሂንቴ ማንቆታ ቶቹታ። ሂንቴና ኡንዔይሳቲ ዲሬታ ጊደኮናዬ? ሂንቴና ዳይና ሲንሊ ጎቹይሳቲ ኤንታ ጊደኮናዬ?

7 ሂንቴ ያጌቴዳ ሎዎ ጎዳ ሱንላ ጫዬይሳቲ ኤንታ ጊደኮናዬ?

8 ሺን ጌሻ ማፃፋን፣ «ኣሴ ኡባ ኔና ኔ ደሴይሳዳ ደሳ» ጌቴቴዲ ያፊቴዳ ያሳ ካዎቴላ ሂጊያ ሂንቴ ፖሊኮ ሎዎ ኦሴታ።

9 ሺን ሂንቴ ኣሳ ሶሞዖ ፃሊዲ ቦንቲኮ፡ ናጋራ ኦፊታ ቃሲ ሂጊይ ሂንቴና ሂጊ ማንሊዲ ኣሳዳ ፒርዳና።

10 ኦኒካ ሂጊ ኡባፌ ኢሱዋ ማንሊዲ፡ ኣቲዳ ኡባ ናጊኮ ኡባ ማንሊዲዳ ታይቤቴሰ።

11 «ለሞፋ» ጊዳ ጎዳይ፡ ቃሲ «ዋጶፓ» ጊሰ። ሺን ኔኒ ላሞና ኣጋዳ ዋጶዳባ ጊዲኮ፡ ሂጊያ ማንላዳሳ።

12 ኣይሌቴላፌ ኬሲያ ሂጊያ ሲንላን ፒርዳ ኤካናው ዴዲያ ኣሳዳ ኦዴቴቴኔ ኦሊቴ።

13 ኣሴ ማርና ኦናካ ያሳይ ማርና ፒርዳና። ሺን ማርቴላይ ፒርዳ ያኔሰ።

ኣማኖኔ ኦሶ

14 ታ ኢሻቶ፡ ሂንቴፌ ኢሲ ኣሲ ታው ኣማኖይ ዴዴሰ ጊዲ፡ ባ ኣማኑዋ ኦሶን ቤሶና ኢደኮ ኢያ ኣይ ማዳኔ? ኢያ ኣማኖይ ኢያ ኣሻናው ዳንዳዒ?

15 ሌሚሶሰ ኢሲ ኢሻይ ዋይኮ ኢሲ ሚቺያ ካሎቴኮኔ ኤንታው ሚያባይ ጳዩኮ።

16 ሂንቴፌ ኢሲ ኣሲ ኤንታኮ፡ «ሳር ቤቴ! ታማ ካዩቴ! ካሊዲ ሚቴ!» ጊዲ፡ ኮሺያባ ኤንታው ኢሞና ኢደኮ ኤንታ ኣይ ማዲ?

17 ሂሳ ጊሾ፡ ኦሶይ ባይና ኣማኖይ ባርካ ሃይቂዳይሳ።

18 ሺን ኢሲ ኣሲ፡ «ኔው ኣማኖይ ዴዴሰ፤ ቃሲ ታው ኦሶይ ዴዴሰ። ኔኒ ኔ ኣማኑዋ ኔ ኦሶዋፔ ሻካዳ ታና ቤሳ፤ ታካ ታ ኣማኑዋ ታ ኦሶዋን ኔና ቤሳና» ጋና።

19 ኔኒ፡ ኢሲ ያሳይ ዴዴይሳ ኣማናሳ፤ ሄሲ ሎዖ። ቱና ኣያናቲካ ኣማኖሶና፤ ያሻን ኮኮርሶና።

20 ኔና ኤያው! ኣማኖይ ኦሶፔ ሻኬቴዲ ማዶናይሳ ኤራናው ኮያይ?

21 ኦ ኣዋ ኣብራሃሚይ፡ ባ ናዓ ዩሳቃ ያርሾ ቤሳ ቦላ ዋሊዳ ዋዴ ባ ኦሶዋን ያሊቤኔ?

22 ኢያ ኣማኖይ ኢያ ኦሶይ ኢሲፌ ኦሊዳይሳ ቤዒኪ? ኢያ ኣማኖይ ኢያ ኦሶዋን ፖሌቴሰ።

23 ጊሻ ማፃፋይ፡ «ኣብራሃሚይ ያሳ ኣማኒሰ። ያሳይ ሄሳ ኢያው ያሎቴሊ ኦሊዲ ታይቤሰ» ጊዳይሲ ፖሌቴሰ። ቃሲ ኢ ያሳ ዳቦ ጌቴቴዲ ያጌቴሰ።

24 ኣሲ ኣማኖ ያላላን ጊደናሺን ኦሶን ያሌይሳ ቤዓሳ።

2:11 ኬሳ 20:13-14፤ ዛሬ 5:17-18 2:21 ሜዴ 22:1-14 2:23 ሜዴ 15:6፤ 2ታሪ 20:7፤ ኢሳ 41:8

25 ሄሳዳካ፣ ላይሚያ ራዓባ ኢስራዔሌ፤ ኪቴተዳይሳታ ሞካዳ ሃራ ኦጌራ ኤንታ ሞይዚዳ ዋዴ ባ ኦሱዋን ሂላቤኬ?

26 ሼሞፖይ ሻኬተዳ አሳቴላይ ሃይቆ ገዳይሳዳ፣ ኦሶይ ሻኬተዳ አማኖይካ ሃይቁዳይሳ።

3

ኢንፃርሲ ናጎ

1 ታ ኢሻቶ፣ ሂንቴፌ ዳሮቲ አስታማሬ ገደፖ። ኑ፣ አስታማሬቲ ሃራታፔ አዲያ ፐርዳ ኤካናይሳ ሂንቴ ኤሬታ።

2 ኑ ኡባይ ዳርባን ባሌቶሰ። ባ ኦዳን ባሌቶና ኦኒካ ባናቴላ ናጎናው ዳንዳዒያ ፖሎ አሲ።

3 ፓራቲ ኑስ ኪቴታና ሜላ ቢፃላ ባርሲዲ ኑኒ ኮያ ቤሲ ኡባ ኤፎሰ።

4 ማርካቤይ ሄሳ ሜላ ገታ ገዲሼ ዋልቃማ ጨርኩዋን ሱጌቲኮካ፣ ኢያ ላጌይሲ ባ ኮያ ቤሲ ዛሪዲ ላጊያ ጉላ ሚላን ላጌቲዲ ቤሰ።

5 ሄሳዳ ኢንፃርሲ አሳቴላ ገደን ጉላ ገዲኮካ ዳሮ ገታባን ጨቁቴሰ።

ጉላ ታሚ ዳሮ ገታ ዋራ ፀጌሰ።

6 ኢንፃርሲ ታማ ሜላ። ኢንፃርሲ ኑ አሳቴላ ገደን ኢታን ኩሚዳ አላሜ፤ አሳቴላ ኡባ ቱኒሴሰ። ጋናሜፔ ኬያ ታማዳ ኑ ዴዑዋ ዋላ ኡባ ፀጌሰ።

7 ደዓታኔ ካፎታ፣ ኡሎራ ጎሼቴይሳታኔ አባን ዴዒያ ሜጴቴላታ ኡባ አሲ ሃራሰ፤ ኤንቴካ ሃራቲደሶና።

8 ሺን ኦኒካ ኢንፃርሲ ሃራናው ዳንዳዒቤና። ኢንፃርሲ ዋዲያ ማርዜይ ኩሚዳ ሃራቶና ኢታ ሜጴቴላ።

9 ኑ ኢንፃርሳን፣ ኑ፣ ጎዳኔ ፆሳ ጋላቶሰ። ቃሲ ኢያራ ፆሳ ሌሚሶን ሜጴቴዳ አሳ ቃንጎሰ።

10 ኢሲ ደናፔ ጋላቲኔ ቃንጌላ ኬዬሰ። ታ ኢሻቶ፣ ሄሳዳ ሃናናው ቤሴና።

11 ፑልቶይ ኢሲ ኦላፌ ማልዒያ ሃሴኔ ጨሚያ ሃላ ፑልታናው ዳንዳዒ?

12 ታ ኢሻቶ፣ ባላሴ ሚላ ሻማሆ አይፋናው ዳንዳዒ? ዋይኮ ዋይኔ ሚላ ባላሴ ሚላ አይፌ አይፋናው ዳንዳዒ? ጨሞ ሃሳፌ ማልፖ ሃላ ኬያናው ዳንዳዒና።

ሳሎ ጨንጨቴላኔ ሳዒ ጨንጨቴላ

13 ሂንቴ ጊደን ጨንጨኔ አከካንቸይ ኦኔ? ባ ሎዎ ዴዑዋ፥ አሽኬቴላኒኔ ጨንጨቴላን ኦሴቲዳ ኦሶን ቤሶ።

14 ሺን ሂንቴ ዎዛናን ጫሚያ ቃናቴይኔ ባና ደሶይ ዴዒኮ ጩቁቶፊቴ፤ ቱማ ቦላ ዎርዶቶፒቴ።

15 ሄሳ ማላ ጨንጨቴላይ ሳሎፔ ዪዳባ ጊደናሺን ሄሲ አሳባ፥ አላሚባ፥ ዓላሄባ።

16 ቃናቴይኔ ባና ደሶይ ዴዒያ ሶን ኦሺኔ ኢታ ኦሶ ኡባይ ዴዎሶና።

17 ሺን ቦላፊ ያ ጨንጨቴላይ ኡባፊ ሲንሉ ጌሺ። ቃሲ ሳሮቴሉ፥ አዳቴሉ፥ ሲዒዲ ኤኬይሳ፥ ቃጴቴይሳ፥ ሎዎ አይፊይ ኩሚዳይሳ፥ አሴ ሻኮናይሳኔ ጨቦቴሉ ባይናይሳ።

18 ሳሮቴላ ደሴይሳቲ ሳሮቴሉ ዜሪዲ ጂሎቴሉ ቡጮሶና።

4

ሃ አላሚያራ ዳቦቶፒቴ

1 ኦሺኔ ኦሊ ሂንቴ ጊደ አወፔ ዪ? ኤንቲ ዬይ ሂንቴ አሳቴላ ሃራናው ኦሉቲያ ሂንቴ አሾ አሙዋፔ ጊዴኔዬ?

2 ሂንቴ አሞቴታ፥ ሺን ዴሜኬታ፤ ሄሳ ጊሾ፥ ዎጴታ። ሚንሉ ኮዬታ፥ ሺን ዴማናው ዳንዳዔኬታ፤ ሄሳ ጊሾ፥ ኦዬቴታኔ ኦሉቴታ። ሂንቴ ያሳ ዎሶና ጊሾ ኮያባ ዴሜኬታ።

3 ሂንቴ ዎሴታ፥ ሺን ዴሜኬታ። ሂንቴ አሾ አሙዋ ፖላናው ዎቤ ኦኬን ዎሲያ ጊሾ ዴሜኬታ።

4 ሂንቴና፥ ሳይማቴይሳቶ! ሃ አላሚያ ደሴይ ያሳራ ሞርኬ ጊዴይሳ ኤሬኬቲ? ሃ አላሚያራ ዳቦታናው ኮዬይ ኦኒካ ያሳራ ሞርኬ።

5 ጌሻ ማፃፋይ፥ «ያሳይ ኦናን ዳና ማላ ኦሉዳ አያናይ፥ ኦኒ ኢያው ቡዞ ጊዳና ማላ አሞቴሰ» ጊዴይሳ ጮ ጊዳባ ዳኒ?

6 ሺን ጌሻ ማፃፋይ፥ «ያሳይ ኦቶራንቸታ ኢጻሰ፥ ሺን ባንታና ካወሺይሳታሰ ማርቴላ ኢሜሰ» ያጊያ ጊሾ ያሳይ ማርቴላ ዳርሲዲ አሜሰ።

7 ሄሳ ጊሾ፥ ያሳሰ ሃሬቲቴ፤ ዓላሄያራ ኤቁቴቴ፤ ኢ ሂንቴፊ ሃካና።

8 ያሳኮ ሺቁቴ፤ ኢ ሂንቴኮ ሺቃና። ሂንቴና፥ ናጋራንቸቶ፥ ሂንቴ ኩሺያ ማጩቴቴ፤ ናሞዑ ቆፊ ዴዔይሳቶ፥ ሂንቴ ዎዛና ጌሺቴ።

9 ካዮቲቴ፥ ዬኪቴኔ አፋጻቴ። ሂንቴ ሚቻይ ዬሆን፥ ሂንቴ ኡፋይሳይ አዛኖን ላሚቶ።

10 ጎዳ ሲገልግል ሂንቴናቴላ ካወሸጥ፤ ኢ ሂንቴና ጶቁ ጶቁ አላና።

አሳ ቦላ ፐርዲፊቴ

11 ታ አሻቶ፣ ኢሶይ ኢሱዋ ዘገርፐ። ባ አሻ ዘገራይኔ ኢያ ቦላ ፐርዲይ ሂጌ ዘገራሲኔ ሂጌ ቦላ ፐርዲሰ። ኔኒ ሂጌ ቦላ ፐርዲኮ ሂጌ ቦላ ፐርዲይሳ ገዳሳፔ አቴን ሂጌ ፖሌይሳ ገዳካ።

12 ሂጌ አሜይኔ ፐርዲይ ያሳ ፃላላ። አሻናውኔ ቆይሳናው ዳንዳዔይ ኢያ። ያቴን፣ አሳ ቦላ ፐርዲያ ኔኒ ኦኔ?

ጩቄቶፊቴ

13 ሂንቴ፣ «ኮኒ ሃቺ ዋይኮ ዋንቶ ያ ካታማ ዋይኮ ሃ ካታማ ባና፤ ያን ላይሴ ኡታና፤ ዘልዒዲ ዋዲሳና» ያጌይሳቶ፣ ሲዒቴ።

14 ዋንቶ አይቢ ሃናኔኮ ሂንቴ ኤሬኬታ። ሂንቴ ዴይ ዋናኔኮ ኤሬይ ኦኔ? ሂንቴ ጉላ ዋዴ ቤንቴዲ ቆያ አካ ሜላ።

15 ሄሳ አገዲ፣ «ጎዳይ ገኮ ኮኒ ዳና፤ ሃይሳ ዋይኮ ሄሳ አላና» ያጋናው ቤሴሰ።

16 ሺን ሂንቴ ሃዒ ኦቶርቴታኔ ጩቄቴታ። ሄሳ ሜላ ጩቆ ኡባይ ኢታ።

17 ሄሳ ገሾ፣ ሎዖባ አላናው ኤሪሼ ኦሶና ኡራሰ ሄሲ ናጋራ።

5

ዲሬታሰ አሜቴዳ ዞሬ

1 ሂንቴና፣ ዲሬቶ፣ ሂንቴ ቦላ ኢታ ሜቶይ ያ ገሾ ዩኪቴኔ ዜሌሊቴ።

2 ሂንቴ ሻሎይ ቡቂሰ፤ ሂንቴ አፊላይካ ቢላን ሜቴቴሰ።

3 ሂንቴ ዋርቃይኔ ሂንቴ ቢራይ ሺዒሰ። ሄ ሺዒይ ሂንቴ ቦላ ማርካ ገዳና። ኢ ሂንቴ አሳቴላ ታማዳ ማና። ሂንቴ ሃ ወራዳ ቃማታን ሂንቴው ሻሎ ዳጋይታ።

4 ሂንቴ ጋዴን ኦሴ ፔዒዳ አሳ ኬራ ሚሺያ ቃንዒቤኬታ። ሄሲ ሂንቴ ቦላ ዋሴሰ። ሄ አሳታ ዋሶይ ዋልቃማ ጎዳ ሃይላን ሲዒቴሰ።

5 ሃ ሳባን ሂንቴ ኡሎ ፃላላሰ ቆፒዲ፣ አንጃን ዴዒዴታ። ሹካሰ ገገቴዳ ሜሄዳ ሂንቴና ቋኪዴታ።

6 ሂንቴራ ኤቄታናው ዳንዳዖና ዒሎ አሳ ቦላ ፐርዲዴታ፤ ኢያ ዋዲዴታ።

4:13 ለሚ 27:1 5:2 ማቶ 6:19 5:4 ዛሬ 24:14-15

ገንጫኔ ዎሳ

7 ታ ኢሻቶ፣ ጎዳይ ያና ጋካናው ገንጫኔ። ጎሻንቾይ ቶርቼ ኢራይኔ ሲላ ኢራይ ያና ጋካናው ገንጫኢ ኣልዎ ካሳ ናጊዲ ዋቲ ጋላ ኤኪያኮ ቆጊቲ።

8 ሄ ጎሻንቾዋዳ ሂንቴካ ገንጫኔ። ጎዳ ዩሳይ ማታቲዳ ጊሾ ኡፋይሳን ናጊቲ።

9 ታ ኢሻቶ፣ ያሳይ ሂንቴ ቦላ ፐርዶና ማላ ኢሶይ ኢሱዋ ቦላ ዘዙሞፊቲ። ፐርዶይሲ ፔንገን ኤቁሰ።

10 ታ ኢሻቶ፣ ዋያን ገንጫዳ፣ ጎዳ ሱንላን ኦዲዳ ናቤታ ሌሚሶ ኦላዲ ኤኪቲ።

11 ዳንዳሳን ገንጫዳይሳታ ኮኒ ኣንጃቲዳይሳታ ጎሰ። ኢዮቤይ ዋኒዲ ገንጫዳኮ ሂንቴ ሲዒዳታ። ጎዳይ ዉርሴላን ኢያ ዋቲ ማዲዳኮ ቤዒዳታ። ኢ ማርቲኔ ቃጼይ ኩሚዳ ጎዳ ጊዲያ ጊሾ ሄሳ ኦላሰ።

12 ሺን ኡባፌ ሲንሕ፣ ታ ኢሻቶ፣ ሳሉዋን ጊዲን ዋይኮ ሳሳን ጊዲን ዋይኮ ሃራ ኣይቢንካ ጫቆፊቲ። ያሳ ፐርዳን ሂንቴ ጌሎናዳ ሂንቴ ኦዳይ ኤ ጊዲኮ፣ «ኤ» ጊቲ፤ ኣካይ ጊዲኮ፣ «ኣካይ» ጊቲ።

13 ሂንቴ ጊዲን ማቶ ኤኪያ ኦኒካ ዳዒኮ ያሳ ዋሶ። ኡፋይቲያ ኦኒካ ዳዒኮ ጋላታን ዩዖ።

14 ሂንቴፌ ሃርጌቲያ ኦኒካ ዳዒኮ ዎሳ ከላ ጨማታ ያጎ። ኤንቲ ጎዳ ሱንላን ሻማሆ ዛይቲ ቲዩዲ ኢያው ያሳ ዋሶ።

15 ኣማናን ዋሲዳ ዎሳይ ሃርጋንቼዋ ፓላና። ጎዳይ ኢያ፣ ሃርጊያፌ ዳንላና፤ ኢ ናጋራ ኦላዲሳ ጊዲኮካ ጎዳይ ኢያ ማራና።

16 ሄሳ ጊሾ፣ ሂንቴ ፓዖና ማላ ሂንቴ ናጋራ ኢሶይ ኢሱዋሰ ፓዒቲኔ ኢሶይ ኢሱዋሰ ዋሲቲ። ዲሎ ኣሳ ዎሳይ ዎልቃማ ኦሶ ኦላሰ።

17 ኤሊያሲ ኦ ማላ ኣሴ። ኢሪ ሳሳን ቡኮና ማላ ሚንሊዲ ያሳ ዋሲን ሄዡ ላይሊኔ ኡሱቱን ኣጌና ሳሳን ኢሪ ቡኪቤና።

18 ዛሪዲ ኢ ያሳ ዋሲን ሳሎፔ ኢሪ ቡኪሰ፤ ሳሳይካ ካላ ሞኪሰ።

19 ታ ኢሻቶ፣ ሂንቴፌ ኦኒካ ቱማ ኦጊያፔ ቡቲኮ፣ ሃራይ ኢያ ቱማኮ ዛሪኮ።

20 ናጋራንቼዋ ኢያ ባላ ኦጊያፔ ዛሪያ ኦኒካ፣ ኢያ ሸምቱዋ ሃይቆፔ ኣሽይሳኔ ኢያ ዳር ናጋራሰ ማርታ ኢሜይሳ ኤር።

5:11 ኢዮ 1:21-22፤ 2:10፤ ማዝ 103:8 5:12 ማቶ 5:34-37 5:17
1ካዎ 17:1፤ 18:1 5:18 1ካዎ 18:42-45 5:20 ሎሚ 10:12፤ 1ጳጳ 4:8

ኦራሳ ጩቂዋ ኅፋሶ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source
files dated 29 Jan 2022
c35d6c73-3843-5482-b53e-7559d35deee5